

Lesing 8 - 7 November 2025 - Die Dogter van Sion, restoureerders van die Skrifte

(Vervolg) Jesaja 1

18 Kom nou en laat Ons die saak uitmaak, sê JaHWeH: al was julle oortredinge soos skarlaken, dit sal wit word soos sneeu; al was dit rooi soos purper, dit sal word soos wol.

19 As julle gewillig is en luister, sal julle die suiwer dinge van die Aarde eet.

20 Maar as julle weier en rebelleer, sal julle deur die swaard geëet word; want die Mond van JaHWeH het dit gespreek. (hulle het egter geweier en voortgegaan met hul Versoeningsdag geloftes)

21 Ag, hoe het die Getroue Vesting 'n hoer geword! Sy was vol Reg, Geregtigheid het in haar vernag - en nou moordenaars! (Die getroue apartheidgestelde, Godvresende Boerevolk het hoereer met haar heidense oorheersers en Bloedrivier, ons getroue vesting, is afgebreek)

22 Jou silwer het skuim geword; jou wyn is vervals met water. (silwer is die Woord (**Psalm 12:6**) en dit is vervals – 1983 Bybels)

23 Jou vorste is opstandelinge en metgeselle van diewe; elkeen van hulle het omkoopgeskenke lief en jaag belonings na. Aan die wees doen hulle geen Reg nie, en die saak van die weduwee kom nie voor hulle nie. (die Bloedrivier leiers eet saam aan die ANC "gravitytrain" en verwaarloos die volk se geestelike belange)

24 Daarom spreek my Meester JaHWeH van die skeppings-leërmagte, die Magtige van JisraEl: o Wee, Ek sal vir My voldoening verskaf van My teëstanders en My wreek op My vyande!

25 En Ek sal My Hand teen jou uitstrek en jou skuim soos met loog uitsuiwer en al jou looddele wegneem. (verwysing na die gerestoureerde Skrifte, die Boek van Herinnering en die Groot Johannes Evangelie wat gebruik sal word om die valsheid en leuens te ontmasker)

26 En Ek sal jou weer regters gee soos vroeër en raadsmanne soos in die begin; daarna sal jy 'n Stad van Geregtigheid, 'n Getroue Vesting genoem word. (JaHWeH se Liefdeswette word herstel met die Melgisédek orde, wat gaan heers uit Sion)

27 Sion sal deur Regspraak verlos word en die van Haar wat terugkeer, deur Geregtigheid.

28 Maar daar sal vernietiging wees van die rebelleerders en die wetsoortreders almal saam; en die wat JaHWeH verlaat, sal omkom. (dood en geestelike dood is die voorland vir hierdie bedrieglike en verraderlike leiers van die Boerevolk)

Omdat hierdie leiers nie gehoor wou gee aan Hom nie, word die beëindiging van hul verteenwoordiging as leiers van hierdie volk aangekondig, en dit word bevestig deur 'n ongelooflike teken, naamlik **die blaar van 'n eikeboom**, 'n eikeboom waaronder twee hope klippe lê in Pretoria, een hoop klippe vir 'n Nuwe Geloofte om ons huis beskikbaar te maak vir Sy Sionskinders, en 'n ander een van onderlinge broederliefde, wat Hy bevestig het met sy arm, wat die olie van die Boek van Herinnering afgevee het.!

29 Want **hulle sal in die skande kom weens die eikeboom** waar julle behae in het, en julle sal rooi van skaamte word oor die tuine wat julle verkies het.

30 **Want julle sal wees soos 'n eikeboom waarvan die blare verdor**, en soos 'n tuin wat geen water het nie.

Susan stap toe die laer binne, neem hierdie blaartjie uit haar Skrif en kry 'n verdere opdrag van ons Vader. Gaan na die oorkantse poort toe, die een waar die Grietjie-kanon staan. Daar aangekom, moes sy net buite die laer, by hierdie poort, die blaar opfrommel en op die grond neergooi, min wetende dat dit **OP DIE PRESIESE PLEK WAS WAAR DIE BLOEDRIVIER-STIGTING DIE 64 VIERKLEURVLAE MET DIE NAAM VAN JAHWEH DAAROP, MET HUL 4X4 VOERTUIG VERTRAP HET OP 16 DESEMBER 2001**, 4 jaar tevore!! Hoe groot, lankmoedig en akkuraat is ons Vader nie! Hoe lank gelede is **Jesaja 1** nie geskryf nie, toe het Hy alreeds geweet dat hulle hierdie gruwelike ding sou doen.

U moet onthou dat Susan nie by was in 2001 toe hierdie Naamskendery op Bloedrivier gepleeg was nie. Ons in Pretoria het ook nie geweet dat sy op daardie oomblik 'n stuk geskiedenis gemaak het nie. Sy self was ook nie eers bewus van wat die implikasies was van hierdie opdrag van haar nie. So gebruik Vader verskillende ledemate van een liggaam om werk vir Hom te verrig, en as ons terugkyk, is ons verstom oor die wonder van Sy beplanning. Ook kan niemand nou vir Dogter van Sion beskuldig van bedrog en versinsels nie. Ons was almal net diensknegte in Sy Naam. Amein!

Hierdie verkrummeling van die eikeblaar kondig toe die einde van die formele Geloofte te Bloedrivier deur die kulturele leiers van die volk aan, omdat hulle nie die oorspronklike inhoud van die Geloofte meer geëer het nie, maar ook nie hul verbod op volksgenote, wat die fees op die terrein wou vier, die afgelope vier jaar wou ophef nie. Hulle het toe in die skande gekom deur die Geloofte onder die eikeboom, wat die ware geestelike inhoud van die oorspronklike Geloofte dra, naamlik die van 'n geestelike volkshuis wat gestig sou word vir die hele Sion wat oor die hele wêreld verspreid is. Hy gaan verder en sê dat hulle self sal verdor soos die eikeblaar en dat hulle geen verdere water/kennis sal kry nie. Hulle sal dus **geestelik** verdor

en die ewige dood sal hul voorland wees.

Onwetend het ons toe werklik 'n vrylating verkry na die vyftigste aflegging van hierdie Gelofte. Nooit sal gesê kan word dat die Bloedrivierstigting, die Voortrekkermonumente-kommissie, die Afrikanerbond, die NG-kerk (aan wie die Bloedrivier-terrein behoort) en die FAK nie geleentheid gehad het om hierdie saak reg te stel nie.

"Mene mene tekel ufarsin". Hulle was geweeg en hulle is te lig bevind!

2006 – Jaar van werk in die wingerd

Hierdie volgende jaar was gekenmerk deur wonderlike seëninge van ons Hemelse Vader, nadat ons die volgende opdragte van JaHshua letterlik opgeneem het en daadwerklik die koninkryk van God met geweld begin nader trek het. **Matthéüs 24:45-46:**

45 WIE is dan die getroue en wyse dienskneg vir wie sy Meester oor Sy diensvolk aangestel het om hulle hul voedsel op tyd te gee?

46 Geseënd is daardie dienskneg vir wie sy Meester, as Hy kom, op hierdie manier besig sal vind.

47 Voorwaar Ek sê vir julle, Hy sal hom oor al Sy besittings aanstel.

Dogter van Sion het betrokke begin raak met die voeding van die volk. Sopkombuise in Danville en Elandspoort is opgerig. Kospakkies vir minderbevoorregtes is uitgedeel. Op die grond self is 50 (nou al sowat 500) behoeftige mense gehuisves in tente en wendy-huise. Elke oggend het ons geleentheid gehad om ook geestelike voedsel uit te deel. Skrifstudie lesings in die oggende het hulself baie vrugbaar getoon. Mense het werklik die woord begin eet. Hier moet ons byvoeg dat daar ook geen tekort aan duiwels was nie. Die was volop, maar as mens diamante soek, moet jy hope gruis deurwerk alvorens jy een diamant kry. Hierdie opdrag was so ernstig op ons harte gedruk, want die volgende skrifgedeelte is 'n groot aanklag teen die hele volk. **Matthéüs 25:31-46.**

31 EN wanneer die Seun van die Adam in Sy Glansrykheid kom en al die Apartes [en] Boodskappers saam met Hom, dan sal Hy op Sy glansryke Troon sit;

32 en voor Hom sal al die nasies versamel word, en Hy sal hulle van mekaar afskei soos die herder die skape van die bokke afskei;

33 en Hy sal die skape aan Sy regterkant en die bokke aan Sy linkerkant sit. [JeségiEl 34:20]

34 Dan sal die Meester vir die wat aan Sy regterkant is, sê: Kom, julle geseëndes van My VADER, beërf die Koninkryk wat vir julle berei is van die grondlegging van die wêreld af.

35 Want Ek het honger gehad, en julle het My te ete gegee; Ek het dors gehad, en julle het My te drink gegee; Ek was 'n vreemdeling, en julle het My herberg gegee;

36 Ek was naak, en julle het My geklee; Ek was siek, en julle het My besoek; in die gevangenis was Ek, en julle het na My gekom.

37 Dan sal die regverdige Hom antwoord en sê: Meester, wanneer het ons U honger gesien en gevoed; of dors, en te drink gegee?

38 En wanneer het ons U 'n vreemdeling gesien, en herberg gegee; of naak, en geklee?

39 En wanneer het ons U siek gesien of in die gevangenis, en na U gekom?

40 En die Meester sal antwoord en vir hulle sê: Voorwaar Ek sê vir julle, vir sover julle dit gedoen het aan een van die geringstes van hierdie broers van My, het julle dit aan My gedoen.

41 Dan sal Hy ook vir dié aan Sy linkerhand (bokke) sê: Gaan weg van My, julle vervloektes, in die ewige vuur wat berei is vir die Satan en sy boodskappers.

42 Want Ek het honger gehad, en julle het My nie te ete gegee nie; Ek het dors gehad, en julle het My nie te drink gegee nie.

43 Ek was 'n vreemdeling, en julle het vir My nie herberg gegee nie; naak, en julle het My nie geklee nie; siek en in die gevangenis, en julle het My nie besoek nie.

44 Dan sal hulle Hom ook antwoord en sê: Meester, wanneer het ons U honger gesien of dors of 'n vreemdeling of naak of siek of in die gevangenis, en U nie gedien nie?

45 Dan sal Hy hulle antwoord en sê: Voorwaar Ek sê vir julle, vir sover julle dit nie gedoen het aan een van hierdie geringstes nie, het julle dit aan My ook nie gedoen nie.

46 En hulle sal weggaan in die ewige straf, maar die regverdige in die Ewige Lewe.

Hier is dit baie duidelik wie 'n skaap is en wie 'n bok is. As jy vir Sy kinders omgee, hulle voed, klee en help uit hulle gevange toestand, is jy 'n geseënde skaap wat die ewige lewe sal beërwe. Indien jy dit nie doen nie, is jy 'n bok, en sal die ewige straf jou voorland wees. Niemand kan verby hierdie vers kom nie. Dis duidelik, reguit en op die man af. Ja, verseker is dit uiteindelik geestelike kos, -kleed en -genesing wat gegee moet word, maar hoe sê jy vir iemand wat drie dae laas geëet het, dat jy nou God se woord aan hom bring. Hy vloek jou en jaag jou weg, want hy is honger. Na drie maande se onbaatsugtige fisiese kosvoorsiening sal hy jou vra hoekom jy dit doen. Dan sê jy: Omdat die liefde van JaHshua wat in my is, en wat ek vir jou het, dit van my vra. Dan eers begin jy die geestelike kos stadig en smaaklik aanbied.